



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 10

Taoba mapang Panama dictator,  
Manuel Noriega süogo

TAPAK 8

Sanjay Dutt Total Dhamaal nung  
shilem magitsü



VOL. XIV NO. 222 (ADOK 222)

DIMAPUR

WEDNESDAY

MAY 31, 2017

5.00

## Bomb apokba lendong SIT-i bushisüngdangtsü

**Dimapur, May 30 (TYO):** May 29, 2017 aonung Dimapur nung bomb apoba lendong bushisüngdangtsü atema züingsem pungü akümba Special Investigation Team (SIT) ka tentetogo.

Commissioner of Police, Dimapur Limasunep Jamir (IPS)-i ashiba agi, ADCP (Crime)-i aniba teloki iba ken o bushisüngdangtsü.

Mongulbarnü Nagaland Medicine Dealers' Association, Dimapur Chamber of Commerce & Industry, Business Association of Nagas aser East Dimapur Business Association-temi Commissioner of Police, Dimapur nem joint memorandum ka agütsü.

Hombar aonung Ideal

Chemist, Dimapur nung bomb pokloksüba dak sendakba nung züluba shidi nung telok pezüi police dang tekaratiba nung aibeleneritem aputsü aser ozüing tapet kübok merenshitsü takhangba agüja lir.

Shishilembartem aser public kümzüka ayutsü atema security forces talila mapa lezmüksütsü atema NMDA, DCCI, BAN aser EDDBA temi Commissioner of Police dang mepishia metetdaksü.

Maneni, Central Nagaland Tribes Council (CNTC), Dimapur District Citizens Forum (DDCF) aser Naga Council Dimapur (NCD) teloktemi sangdong balala nung bomb pokloksüba inyakyim kukua aitsür ta metetdaksüogo.

## NCD aser UNTABA-i nisung apuba aitsür

**Dimapur, May 30 (TYO):** May 28, 2017 anepdang 8:00 ako meta Assam Police aser Forest Personnel temi Assam den arrtsüa aliba Rilam yimer pezü apuba kulua aitsür, ta Naga Council Dimapur (NCD) aser and United Naga Tribes Association of Border Areas(UNTABA) külem sangdong ka nung metetdaksüogo.

Mongulbarnü NCD aser UNTABA külem senden ka

amendang, Assam Police aser Forest Personnel temi tashiyim amshia par pezü apuba aser Diphu Police Station nung ozüing alema puokba onük benoka olemtep, ta sangdong nung shia lir.

Diphu, Golagath, Jorhat aser Sibsagar anasa aliba district tem nung Nagaland sensotem apuba aser parnok chioktsü atema Assam Police-i sen meshiba onük aitsür, ta parnokisa ashi.

(Maneni tapak 11 nung...)

## Senpak note tasen adoktsü

**Mumbai, May 30 (Agencies):** India nung senpak note tasen ka kobi melii adoka amshitsü, ta sorkari metetdaksüogo.

India sorkari senpak note menüingba ya 1994 küm anen saka ano 2015 nung tenzükshia liasü. Tang sorkari sen ka indang senjang menüinga amshir.

"Reserve Bank of India-i kobi melii sen ka indang note tasen adoka amshitsü. Note tasenba nung Ministry of Finance nung

Secretary, Shaktikanta Das indang sign alitsü aser tantüingba note tem nung RBI Governor indang sign alitsü" ta RBI-i sangdong ka nung metetdaksü.

Senpak ka note tasenba tesülen '2017' küm menüingoka lir aser 'Sagar Samrat' indang noksa enoka lir.

"One Rupee Currency Note indang sentsüji temalen pink green aser tesülen tanga sentsütem lir" ta RBI-isa metetdaksü.

## Meghalaya-Myanmar Highway Project tenzüksü

**Mumbai, May 30 (Agencies):** Taruba ita nungi Meghalaya nungi Myanmar highway yangluba mapa tenzüksü aser iba ya India-Myanmar-Thailand tenangzüktep agiba nung shilem ka lir, ta Road, Transport, Highways & Shipping Minister Nitin Gadkari-i ashi.

"Taruba ita nungi Meghalaya nungi Myanmar project

tenzüksü. Iba mapatong nung sen crore 5,000 endoktsü" ta Mongulbarnü Gadkari-i ashi.

India, Thailand aser Myanmar linüktemi Southeast Asia den sendaktepsü atema kilometer 1,400 talang highway ka yanglutsü sentong atonger. Iba lenmang ajanga shishilembaba, health, education aser tourism nung tajangzük angutsü.

## Tzurangkong nung NSF lokti senden tenzükogo



Tzurangkong nung NSF lokti senden tenzükba sentong nung adenertem den tongti tejaoker, Parliament Secretary, Dr Benjongliba Aieri jembiba noksa nung angur. May 30, 2017.

**Tzurangkong, May 30 (TYO):** Tzurangkong nung Ao Kaketshir Mungdang (AKM)-i ayongba Naga Students' Federation (NSF) 27 buba lokti senden Mongolbar aonung nungi yangi Tzurangkong nung tenzükogo. Iba sentong nung tongti tejaoker Parliamentary Secretary, Dr. Benjongliba Aier liasü.

Iba sentong nung jembidang, Dr. Benjongliba Aier-i Naga nung kaketshirtem dang kati ka akümtsübutepa longjema

alitsü asoshi ayongzük. Paise Assam, Arunachal Manipur aser Myanmar nung aliba Naga nungertem ajak kibong ka chir ama kati ka den yaritepa putepa alitsüla ta metetdaksü.

NSF teloki tetenzük nungi Naga nung ajak longjema alitsü asoshi tensa tia tamajung aika tizükteta aruogo ta Dr. Benjongliba NSF telok nung sanga metetdaksü.

Iba mungdang sentong

tenzükba, NSF tir, Wb. Subenthung Kithani NSF nisan atsüket aser AKM Planning Committee nung tayonger, Wb. Imchatoba Imcheni tarur pelaa agizüka jembiba. Iba sentong nung Rengma Students' Union-i ken tajung ka tena liasü.

Iba mongdang sentong ya May 31, 2017 anepdang Union Home Minister of State, Eno. Kiren Rijjui lapoktsütsü aser June 1 aonung atemtsü.

## Arogo lennirtem atema 'Immunization & Maternal and Child Health Service' workshop tenzükogo



Kohima nung arogo lennirtem asoshi temang anema alitsü ayongzükba sentong nung Health & Family Welfare minister, P. Longoni jembiba noksa nung angur. May 30, 2017. (DIPR)

**Dimapur, May 29 (TYO):** Mongulbarnü Hotel Vivor, Kohima nung arogo lennirtem den 'Immunization & Maternal and Child Health Service' indang anogonü workshop sentong ka tenzükogo.

Iba workshop ya State Health Society-i UNICEF den yaritepa ayongzük aser tanü sentong nung tongti tesemdangerji Health & Family Welfare Minister, P. Longoni liasü.

Sorkar atema tongtipang teinyaksütem rongnung temang anema alibaren indang lir aser sorkari iba asoshi maneni mapa inyaker, ta Health & Family Welfare Minister, P. Longoni tanü o jembidang ashi.

"Health asoshi inyakba tajangzüktem nisung ajaki angutsü atema mapa ajak loktiliba den yaritepa inyaker. Ajisüaka, mapa inyakba aser nübertem nem osang sangoktsüba tsüingda ongong ka aliba ajitet. Sorkari health scheme aser programmes inyakba indang osang nübertem dang junga memetdaksür. Ibaji ajanga

mapatemtakom ngua meinyakteter" ta P Longoni-isa metetdaksü.

"Nagaland state nung immunization programme junga meinyakteter. Osang shitak mesangdongba aser immunization sülen timtem ajurur ta asüba ajanga takom ngua meinyakter. Talisa, tsürabur aser kibongtemi vaccines indang osang junga memetetba agi vaccination mesüdaksür" ta paisa shisem.

Sorkari yimtsüngtem nung health workers ajanga village health & nutrition mesükba sentongtem ayonga agidar. Item sentong takom ngudaksütsü atema tanga sorkar department tem den civil society teloktem, tamangba teloktem aser volunteers-i yaritepsüla, ta Longoni-isa ashi.

"Iba khuret atema arogoi shilem tulu agitsüla. Asen state nung civil society tongtipangtibaji arogo lir. Arogoi mapa tajung inyaka arubaji ajaki meteta dang lir, anungi health dak sendakba maparen nunga arogoi


yaritepsüla" ta paisa ayongzük.

Sentong nung Chief of Field Office, UNICEF Assam, Dr. Tushar Rane-i o jembidang, state nung tanur asüba jenjangji 29 lir aser linük nung immunization jenjang tajemtibaji Nagaland nung lir aser iba khuret asoshi temulung agüja mapa inyaksüla, ta ashi.

RSOC, 2013-14 ajanga Nagaland nung immunization jenjangji 33.6% dang lir ta bushiteta metetdaksüogo aser ibaji tanur 3 nungi 1 dang immunized asüba lir, ta paisa shisem.

"Asen linük nungi polio aser small pox samatsüogo aser kasa inyakyim nung IMF, Institutional Delivery aser Immunization mapa inyaktetsü" ta Dr. Rane-isa metetdaksü.

Nagaland nung child health care jenjang tajungba kümdaksütsü atema inyakba mapa nung Nagaland Baptist Church Council, Nagaland Christian Revival Church aser Catholic Association, Nagaland temi yaritepsü.



**SENYONG NÜ SENTI VOTE TEYOKMA. TANÜ ASEN LIMA NUNG TEMENEN AJAK DERAJI SENYONG VOTE AYOKBA YA LIR.**

## Ao Baptist Pastors' Fellowship ajanga Aoli Arogotem ajak dangi

*Temeim sannüker aser arogo nung tenzükertem,*

Tamasa Ao Baptist Pastors' Fellowship (ABPF) nungi Yisu temeim salem tulu lemsateper. ABAM Office ajanga osang yokba (shiti ajanga) ngur alitsü amanger. Iba osang dak sentakba maparen arogotem nung sannükertemi anir inyaksü ABPF ajanga ano yamai khen nenshia metetdaksür:

1. June 1, 2017 aonung 7 ako (IST) shitak nung Ao Baptist Arogotem ajunga nung Sentep Ki shia nung tsüngtsüng tenetben (7 times) atemtsü aser amangbapur shia kong lidir liaka minute ishika pei aliba tesem nungji Clean Election atema aser India nung tamangertem reshikangshiba atema sarasademtsü. Iba tsüngtsüng ya hopta ka tepiyong aonung shia kasa mapang nung tema sarasademtsü, iba sülen tsüngtsüng metemaka aonung shia 7 ako shitak nung sarasadembo agia aotsü, aser aji Tsüngremi mulungba mapang ka tashi agitsü. Sannükertemi tekülem sentep nung kanga junga rasa shiangma. Iba kasa aonung nungi ABPF aser ABAM ajanga yokba ama sarasadem yinzü 7000 hours tenzüksü; ajaki kanga dang nendaka pei ataba shilem agitsü ayongzüker.
2. Clean Election theme song Mr. Wati (Samaro) ajanga mejemer joko recording studio nung tan hopta tsüngda tembanga inyaksü lir. Iba ken sound track dena yangludagi, kodang temdir sannükertem WhatsApp ajanga arogotem ajak dangi ken denji sound track yoktsü. Sannükertem kar WhatsApp group nung melira nü WhatsApp number teküboklen agüja aliba ABPF Mendenbuba dangi yokangma. Iba ken July 23, 2017 Aoli arogo sannükertem pulpit exchange asüba anogo nung atentsü renema atatsü mepishir. Iba sülen Aolima tekong tenem ajak nung iba ken atentsüsa tenla kidang amangbapurtem ajak dang sayutsü mepishir.
3. Asenoki renemba ama Clean Election wako (flag) yangludagi; arogotem ajaki sample bener yoktsü. Iba wako yaa 23rd July sannükertem pulpit exchange agiba sülen kija aser kibong shia nung temulungertemi asongtsü. Pei arogo den apet iba wako agütsütsü sentong tajung yanglua inyaksü sarasadema atadaksüner.

Tsüngremi item sentongtem ajanga Ao lima aser Naga lima ajunga nung election merüka agitetsü kanga dang sarasadema aser kanga dang nendaka inyaki ta ayongzüker.

**Temetetsü :** Iba osang ya ngur pei area Sannükertem Telongjem mendenpurtem ajanga osang yoktepangma

**Kibuba nung tenzük**

Sd/-

**N. Lipok Jamir**

**Pastor, Ao Baptist Church Diphupar**

**Mendenbuba, ABPF**

**Ph-9615370625**

## Thahekhu nung Drinking Facility & Solar Street Lights sayatsü



*Executive Director, IO-AOD, Guwahati, Dipankar Ray (achiji nungi tasembuba) den Parliamentary Secretary, Tovihoto Ayemi aser yimtsüng lennirtem külemi agiba noksa ka angur.*

**Dimapur, May 30 (TYO):** Mongulbarnü Indian Oil, Assam Oil Division (IO-AOD), Guwahati, Executive Director, Dipankar Ray-i Thahekhu yimtsüng nung Water Drinking Facility aser Solar Street Lights lapoktsüogo.

Iba ya Indian Oil Corporation (IOC)-i corporate social responsibility kübok yangluba liasü.

Company-i nisungtem atema mapatong balala

inyaksür saka ibaji nübertemi company nem corporate social responsibility indang mapa inyaksü maangka agütsüba ajanga dang lir, ta Ray-i o jembidang ashi.

Company-i Thahekhu village adopt süogo, anungji maneni iba mesükba mapatem inyaksü, ta paisa shisem.

Sentong nung Economics & Statistics Parliamentary Secretary, Tovihoto Ayemi-ia o jembidang, Indian Oil

Corporation-i yimtsüng nung mapa inyakba atema pelaba metetdaksü aser ano tarutsü nunga mapa talila inyaksü imlar, ta paisa shisem.

Thahekhu Village Head GB, Hukiye Yeptho-ia yimertem ajak tenüng nung company dang pelaba ashi.

Iba sentong nung Indian Oil Corporation ktdangsertem, ex-Minister Hewoto Awomi, yimtsüng lennirtem aser taintem aika aden.

## Mkg nung nisung shibelenba indang sentong agi

**Dimapur, May 30 (TYO):** May 30, 2017 nü Town Hall, Mokokchung nung Human Trafficking indang Legal Awareness sentong ka ayongzüka agi.

Iba sentong ya Nagaland State Commission for Women (NSCW)-i National Commission for Women, New Delhi den yaritepa ayongzüker.

Nisung shibelenba maparen ya kanga dang junga sentong atonger inyakba mapa ka lir aser iba ya alima nung kanga

kara ainer, ta NSCW Chairperson, Dr. Temsula Ao-i o jembidang ashi.

Nisung shibelenba ya tapu balala agi inyaker aser Nagaland nunga inyaker. Anungji, iba khuret anema inyaksü asoshi asenoki iba ya kanga junga angatetsüla, ta laisa ashi.

Nisung shibelenba onük meteta lidaktsütsü atema district aser sub-division ajak nung sentong ayonga inyaker, ta Dr. Temsula-isa shisem.

Iba sentong nung mendenji NSCW member, Asangla Cholong liasü, Watsu Mungdang tiri tesentepertem pela agizük,

Additional SP Mokokchung, Yarenthung aser State Trainer & Legal Aid Council, NSLSA Mrs. Esther K. Aye nati o tatsütsü jembi.

Sentong nung Ao Senden, Watsu Mungdang, Ward Authority aser Mokokchung nung kiyong 18 nungi Watsu Unit tem aden.

## 45th WEDDING ANNIVERSARY

(31st May)

MRS. KILANGLA IMCHEN & MR. M PANGER LONGKUMER



Temeim Oja aser Oba,

Nena taküm ya onok asoshi tayongzüka tulu - kibong kümer medemer ama meimtepa lia otetba tatishitsü tajung akaba taküm ana. Nenati onok asoshi aremzüka, bendanga agüja anepaluba temeim mapatemji kecha dena asadangtsü makok.

Onok kanga moatsüogo.

Ibai nena kibong akümba anogo, Tenüngsang agütsür !

- Temeim chirnur, anükapang & semchirtem

## NLSF-i Mkg nung 'Clean & Fair Election Campaign' agi

**Dimapur, May 30 (TYO):** Nagaland Law Students' Federation-i May 25-28, 2017 tashi Mokokchung District nung 'Clean and Fair election' campaign agiogo.

Yimtsüng jenjang nung alirtem dang India Linük temzüng nung election indang telatetbatem aliba metetdaksütsü atema iba sentong ya NLSF-i ayonga agir, ta Tir, Imliben Lemtur aser Medochutuo Kiewhuo nati sangdong ka nung metetdaksü.

Nagaland tajungba kümdaktsütsü nükjidong nung NLSF-i election nung tim masüba inyakyimtem metetdaksütsü aser meinyaksü atema sentong balala ayonga agir.

Naga loktiliba nung yimi candidate shimba, polling station makdokba, candidate dang nungi süpokrem agiba, tangar tenüng amer vote agütsüba, camp lapokba, yi amshiba

inyakyim lir, saka item ajak ya Linük Temzüng agi memelar. Naga nunger nem India Linük Temzüng nung Arrla 371(A) kübok temeten balaka agütsür saka asenoki iba ya aibelena angateta amshir.

NLSF-i yimdaklirtem den ajurutepa sensaksem dang, election mapang tangari arua yimtsüng nung mapa inyakba aser ibaji anema menokdaktetba khuret angazükogo. Anungji, Naga nungertemi asen tarutsü raksatsü indang maparen meinyaksü mepishir. Asen tarutsüji tangar nem masü saka asen sasa yanglutsüla aser ochishia election dak sendakba maparen inyaki, ta NLSF-isa sangdong nung metetdaksü.

NLSF-isa Member Secretary Mrs. Nino Iralu-i anir Nagaland Legal Services Authority dang pelaba metetdaksür, ta mendenpurtemisa ashi.

## 'Taochi' ta ser kensep ka saya



**Dimapur, May 30 (TYO):** May 30, 2017 nü Cosmos Hall, Mokokchung nung Straightway School Proprietor & Chairman, Dr. Aotemshi-i Longjemdi Kichu indang 'Taochi' kensep sayatsü.

Iba kensep nung ken 8 lir aser kensepji asür L Taliakum

Pongen nem bendanga agüja adok, kechiyong asür L Taliakum pa ajungmeso, ta Longjemdi-i ashi.

Kensepji 7 Chord Studio nung record asü aser Court Music Store, Mokokchung, Amazing Grace Ministry (# 9615387580) aser OM Book store, Dimapur nung angütsü.

# Meghalaya BJP lenirtemi party toktsütsü amokmeren

**Shillong, May 30 (Agencies):** Meghalaya nung Bharatiya Janata Party (BJP) lenirtemi Mongolbarnü, Modi-i aniba sorkari nashishi shishilembaba nung ozüing tasen yanglua aliba magienra parnoki party toktsütsü ta amokmeren.

"Meghalaya nung party lenirtem aika ozüing tasenba agi mepelar, koba ajanga

nüburtem libaliro aser senotsü ren nung timtem adokdaksür," ta BJP tatong tir John Antonius Lyngdoh-i osang benertem dang ashi.

Lyngdoh-i ashiba agi par telok iba ken o dak sendakba nung Hombarnü mapang talangka lemtepogo.

"Onoki nashi shishilembaba aser tepsetba dak sendakba nung ozüing tasenba ya

magizükteter. Onoki onok achiajemba yimya anema motettsü aser aji dang masü nashi shishilembaba aser tepseta ayokba nung sendaka alirtem senotsüren nung takoksa maludaktsüner," ta taoba Food and Civil Supplies Minister-i ashi.


Ajisaka BJP tir Shibun Lyngdoh-i John Lyngdoh o sendokogo.

"Ni ozüing tasenba dak sendakba nung kecha telangzüba magütsüner kechiyong iba ya temzüing ozüing dak sendakba maparen ka lir, saka shirnokisa party toktsüner parnoki party tokjang," ta tir-i ashi.

Hombarnü BJP lenir Bernard Marak-i ashiba agi, par teloki sangküm election koka Meghalaya nung sorkar

kümtetra parnoki nashishi menokdangtsü saka nashi tepsetba ki tem nem shishilembatsü asoshi temelaba agütsütsü.


"Meghalaya nung BJP lenir timba kati nashishi achir. Anungji Meghalaya amala state ka nung nashishi shishilembatsüba aser achitsüba nokdangtsübaji tamakoktsü lir," ta pai ashi.



**Sob maiki manoto taekhan pabole takia**  
**Respect aro dignityto pabole paribo**

Pradhan Mantri Ujjwala Yojana to below poverty line household vektorle thakia 5 crore maiki manukhe lech dibo.

"Arojan Mantri Ujjwala Yojana kea gromi Arojan Yojana vektorle thakia 5 crore maiki manukhe lech dibo. Arojan Mantri Ujjwala Yojana kea gromi Arojan Yojana vektorle thakia 5 crore maiki manukhe lech dibo."



**KIREN RILUJU**  
Union Minister of Power for Home Affairs,  
Govt. of India

**Oratious presence**  
**MANJING L. RACHHIN**  
Minister of Power, Civils, Change Division,  
Govt. of Meghalaya


**Special Guest**  
Member of Legislative Assembly,  
(Meghalaya, Meghalaya)

**Special Guest**  
Member of Legislative Assembly,  
(Meghalaya, Meghalaya)


**Special Guest**  
Member of Legislative Assembly,  
(Meghalaya, Meghalaya)

◆ **Venue: Imbhangar Memorial Centre (IMC) Hall, Dimapur**

◆ **Date: 31<sup>st</sup> May, 2017, Time: 03:00 P.M.**



**Clean Fuel. Better Life.**





## TIR YIMYIM YIMOBILEM (EDITORIAL)

DIMAPUR WEDNESDAY, MAY 31, 2017

### TETSÜBUTSÜ LIMA MEKÜMDAKTSÜTSÜLA

**N**agaland nung nübortem asoshi teyari angudak meliaka pei lima aser pei yimti yimdong nung senzütsübo tetsübu melii lia aliba mapang ka yakonung Dimapur nung mozü ayokba dokan ka nung nisung kari bomb pokloktsüba mapaji taoksatsüka, tetsübuttsüka aser pei lima memeimi inyakba mapa ka asütsü. Atangji, Nagaland nung shisabolutsü mapatem aika lir saka injang bomb tsübuba agi nübortem dokan mementet aser dokani moutettsüسابو mesüi tesünep nung aliba tensa tia agi asenok Naga nungertem pi tsüngdang terabo nümadangtetsüsa alir. Ajisüaka, tangar dang nungi asenok lenmangsa tamajungba, mozü kidang taneptsü angutsüsa masü aser school kidang kaketshisatsü magütsütetter ta aliba mapang ka ano yimti nunga sadema mesenzütetsüsa tetsübuttsüka kumdahtsüra alima tsüngdang Nagaland ya konganga mayu ka asütsü. Atangji, küm ishika tejaklen, mapang kabo Nagaland nung alirtem atema pei yimti aser pei lima nung senzütsü asoshi tetsübuttsü aser tarendahtsü tuluka liasü, kechiyong kodang koba mapang nung khateptsüar memetet ta asüba tetsübu tensa tia ka nung nübortem liasü. Ajisüaka, Tsüngrem taochi agi item tetsübuttsü mapangtem ajak süia yoker, tangbo nübortema tetsübu melii aonung ayaterem nung asüyonga senzütetsüsa tensa terabo tajungba kati aruya alidang dokan nung tashi bomb poklokkja inyakba mapajibo kanga tejashitsü mapa ka inyakogo. Atangji, nisung taküm aotsüsa bomb poklokkja meinyakyonga asen lima nung sarusachi onsara nungji business inyakertem aika temulung animesüngzükteti alitsü. Iba kisüng jagia asen lima renloka onüyonga mouteti timatemer. Ajisüaka, iba ama mapatem agi telidak nisungtem shisabolutsüsa atalokba mapatem agibo tangar bendang limatem nung alirtem Nagaland ya tetsübuttsükabo mereprangtsü. Tanü asenoki tonga maoyonga Iraq, Syria aser Afghanistan ta angashidang tsüba bilemer, iba kasaji kodang Nagaland nunga yakonung atalokba ama bomb lendong atalokdir, item limatem denji kasa kiralongrartem aliba lima ama nisungtem mulungjang nung tetsübuttsü aketba lima ka kumadoktsü. Kechisüdir süaka Nagaland-bo kiralongraba mapatem nungibosa kumzüka alitsüla. Atangji, item alima aser lokti menendahtsüba mapatem ajungaji state nung yimten yimsüsürtemi ochishia nübortem nungdak atalokdakja yimsü sütet nung dang mali kuma koktetsü. Aji oda, nübortem ashi auya mesüdahtsüi ochishia lidaktsütsübaji yimten yimsüsürtem dak tuluka keta lir. Iba atemajiang yimten tentet. Ibayongji, yimteni külen nübortem nungdak repranga anepaludang, ano külen tashimangar aser ozüng raksartem nokdangtsü aser merenshitsü asoshi ozüng amertem lir. Ano, tanübo alima tashitemetet nung kanga junga inteta aküm nungji kilong nung dang masü saka kima yimdong aser nübortem shishilembadak ajak nung CCTV enoka lir. Iba jagi kari mapa tamajung inyaker ajenyonga iba cctv nung tangoka aliba noksa jagi melamelaa putetter. Aji oda, yimti yimdong aser nübortem oli aruli jajadak ajak nung cctv enoka yutsüra, iba tsübuba kisüng jagi mapa tamajung inyaktsü bilemyonga meinyaktet anena adoktsü. Item nungdak ajakji asen lima nunga yimteni anepalua inyaktsüla. Atangji, asen lima nungbo government sentong nung aliyonga ketdangsertemi nübortem meima mapa kuma meinyaker. Ashiko, asenok aikati yimti yimdong aser shishilembadak ajak nung cctv enoktsü agibo iba senji miima agizüka bara kiang tuluka yanglutsüa akok. Iba amaji nübortem taneptsü melamelaa angutsü atema government mozü ki jungjunga yanglutsü agibo farm-ang tuluka ayimtsü. Iba kasaji asüng asen lima ajungtsü atema tanü tanurtem atema government school jungjunga anepalua yutsütsü agibo aliang tuluka alitsü. Iba amaji ozüng raksartem mittsü asoshi lemsükba sen agi kiojenang kar aliloktsü. Iba ama pei ajungtsü saka tangarbo jungjunga akoksatsütsü ta inyakba agi pei dena pei lima nung tetsübu agi tesenzü majung akümer. Ashiko, iba amaisa ora kenübo nübortem meyong rongsen agi pei meyong kümer senzürtemjiang bomb lendongji ajurutsüa akok. Tanü Dimapur nung tetsübuttsü lendong atalokba ya dokan kiburtem atema dang masü nübortem ajak asoshi tetsübuttsü aser tarendahtsü mapa ka lir. Iba amai mataloktsüsa government nung alirtemi ochishia mapa koka inyaktsüla aser yimti mitkartemia tanü putu tensa den peta yimti anütsüla aser nübortema kanga saksalema alitsüla.

## OLEMSABANG

### MOATSÜ-MONG ASER TSÜNGREM-MONG AMONGBA YA TEMENEN ASÜ ?

- L.Kika Pongener, Aoyimküm, Dimapur.

Tanü asen putu nung asenok Khristan tamangertem rongnung Moatsü-mong aser Tsüngrem-mong amongba ya karibo temenen aser tai amai angateta ashishiteper. Ano tip külen tanü lanur tashitemeteter tazüngertemibo Moatsü-mong aser Tsüngrem-mong ya asen sobaliba nung tongtipang benjong lir, anungji iba benjongmong ana ya mesamai wazüka ayutsülaa ta ashir. Aji oda, ibala onük nungji asenok tsüngda tangatetba teraka tepila lir amai angateter. Anungji ni iba ocet ajanga kü tebilemba aser tangatetba kar lemsateper. Asenoki kodang tejen laishiba otsütem nungji züngdangdir Israel nunger par sobaliba benjongbentsü aika monga aruba asenoki angutsü, aser item benjong rongnung ajak dang tongtipangba benjong kaji "Piyazü meinokba amtsük benjong" ta-ka ajar, "Suia aoba benjong" ta-ka ajar aser "Kümtetsü benjong" ta-ka ajar. Iba benjong ya par sobaliba nung kanga metsüngareta tanü putu tashi munga arur. Par tetsü-tebou nunger ljiip lima alar tia nung aliba Mosai anir Kannan limai apusoba aonung aritepa piyazü minokba amtsük takong yanglur san tepseta iba azü kikümdong nung mezüluka ayutsü, aser iba shi soa achitsü parnok dang Tsüngremi ozüng agutsü, aser iba aonung kibong shia kidang Yihova Tsüngrem suia ao, aser shir kikümdong nung san zü mezüluka maka, par kibong nung jabaso mezüng asoba aser shiruru mezüng mepuba ajak tepseta toktsü. Israel kin otsü nung iba aonung ya kanga tongtipang otsü-sütsü tatalokba ka liasü. Anungji Israel nunger Kannan lima tonger sobalibaa lia aodanga kechi koma'ar ka libaliro jenjang melenshia lia oaka, iba "Kümtetsü Benjong" ya mesamadaktsüi tanü putu tashi kanga metsüngareta amunger. Israel nunger par sobaliba nung tebur tain senso tajung kati küm asem atong-atonga küm ka danga iba benjong amungi par limai marura, Yihuda nunger senso nungi jentoker ta otsü zülurtemi ashir. Asen Ao kin dang masü saka asen Naga nunger tangar kintema iba Moatsü-mong aser Tsüngrem-mong den mesüktepa amungba asenoki ajurua ngua arudagi. Angami nunger Sekrenyi, Sema nunger Tuluni, Lotha nunger Tuko Emong, Konyak nunger Aoleng, Sangtem-er Mongmong etc. yamaji asen Naga nunger tangar kintemi-a benjong-bentsütem amunger. Aji oda, kechiba asen Aor sobaliba nunga iba Moatsü-mong aser Tsüngrem-mong iba benjong ana ya otsüla-oboula nungeri kanga metsüngareta monga aru ta asenoki bushidangra, Yisu yimsü osang tajung asen Ao limai marudang otsüla oboula nunger par limapur mapang Lijaba, Anungtsüngba, Longkitsüngba aser Süng-Lung dang tsüngrem ta jar külema lia aruba mapang nung süaka parnokia asen mimchir yanglusang, aser asen mimchir nem kechisarena moatsüsang tsüngrem kabo lir ta amanga aru. Anungji alu tasen leppoka jiteta rongteter külen metsüjangnatsü rema alu atenba mapa ajak tema arudir, parnoki alu nung metsüjang arembaji alinung tarutsü mesen, ozü sangnu, susang-koya aser yipro-mopong tesashi nungi kümzüker tsüksüng-insüng südakjang, arenketa tsük chen sünga bendentsüsa rodaktsüa moajang nii... ta parnoki külemba tsüngrem dang temoatsü meshia anogo terok nü tashi amung, iba dangji parnoki Moatsü-mong ta aja. Aser Moatsü-mong ya yimtsüng kari April ita nung munga aru aser yimtsüng kari May ita nung munga aru, ajioda Aorsa asüyongjia alu adenba aser metsüjangnatsü yokba mongpo terabo tepila lir asünungji iba mongpo apir pei pei sasep munga aru, aser ano Tsüngrem-mongjia kasaji alu aroba mongpo apir yimtsüng shia pei pei sasep munga arua liasü.

Ajisüaka, Aor yimtsüng ajunga liromedema amungtsü mechi anogo teroknü tashi memungi anogo asem tang amungtsü Aor tashitemeteter tangateter lenir tajungtem aser kaketshirtemi bangzünga lemteter Moatsü-ji May ita 1-3 tashi liromedema amungtsü Aor yimtsüng ajaki mulonga agizük. Ano tanabuba nung kodang alu nung tsük rozüker jendang bendena süngjanglijang ajak ongzükma-a aser akhi alu mapa ajak temdir parnoki külemba tsüngrem nem tenüngsang agüja amung, iba dangji parnoki Tsüngrem-mong ta aja. Aji oda, limapur süaka otsüla oboula nungeri teyanglur tsüngrem kabosa lir ta amanga aser külema temoatsü meshia aser tenüngsang agüja munga aru. Aji oda iba Tsüngrem-mong ya-a Aor yim ajunga liromedema amungtsü mechi nung August ita 1-3 tashi amungtsü bangjema lemteter, tanü tashi liromedema munga arur. Tanü Khristan yimsü agizüker külena iba den mesüktepa arogotem ajak nung alu rozüker süngjanglijang ajak ongzüker külen pei-i züsentetba aser pei akaba tajungtiba nungi Tsüngrem nem tenüngsang agütsüba (Thanks Giving) sentep sentong tajung yanglur amunger. Aji oda, otsüla oboula nunger limapur mapang nung süaka parnok tangatetba yari parnoki amangba aser külemba tsüngrem tang temoatsü meshia aser tenüngsang agüja longsoitepa pelatepa munga aru.

(Maneni taruba adok nung...)

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir

## Asen tetsü tebou tamang tir Tsüngrem tenyar ajanga teyanglur Tsüngrem den jembiba, aser alima Tsüngremtem den arasentsür kar ajanga jembiba tapu ana indang tatsüka rasaa shiner.

- R.Imkong Lkr, 4th Mile, Diphupar: Dimapur - 797115

Ni laishir ka mesüaka kü tangatetba yari Temeshi Laishiba nungi asen tetsü tebou tamang tir Tsüngrem tenyar ajanga teyanglur Tsüngrem den nüburtem asoshi tongtepratepa jembitsüba kuli kar den akhi asen tetsü tebou mapang limapurtem Arasentsür kari nüburtem atema par tsüngremtem den jembitsüba indang kar medemdanga tatsü agi rasaa shinür.

Akhi tejen lai pututem mapang nung Isaia ainkar, Yerimia ainkar aser Tsüngrem tenzüker Noa-i Tsüngremi ashiba angaa pa den jaja. Lipok 6:9. Tsüngremi Noa tang meimchir tatem anogo indang jembiba aser parnok samatsüdi Lipok 6:13, yamai Tsüngrem den jadaka jembisangji Noa liasü. Aser ano Abraham den Tsüngremi tezüngzüktep ka yanglu aser pa tenüng Abram ta majatsü, saka Abraham ta jatsü, kechiaser kin jenti tebu pa kümdaktsü Lipok 17:3-5. Mosa den Tsüngrem tenyar ajanga süngsem nungi milak adoka jembiba. Anitet 3:4-5. Tsüngremi Mosa tang ashi, ni nür tsürabur Abraham, Isak aser Yakob Tsüngrem lir ta metetdaktsü Anitet 3:6. Mosa anogo lir nü aser lir aonung Sinai tenem nung lumia ali aser tesülen pai lungpak nung tezüngzüktepba o, ozüng terji zulua bener Israel purtem dangi aru. Anitet 34:28. Tetezü Mosai Tsüngrem den jakdaka Jembiba Mosa ozüng ter tezüngzüktepba, Nangzüktepba bener arua Israel purtem den ajurutep.

Yihusua 5:15 Aser kibuba temeranger walunir jagi Yihusa dang ashi, nü tetsü nungi na tsüngsem semzü kang, kechiaser na noktadkaji temeshi li lir ta Mosa lennir dang ashiba küsa o-ji Yihusua tanga ashi. Yihusua 3:17-Kibubai Yihusua tang jambia ashi, tanü Israel ajaki ngua ni na uludaktsüsü tenzüker, oda Mosa den ni dena aliba ama ni ne den atenba Israel purtemi metet-tsü. Tsüngremi tanur Samuel den jembiba. 1 Samuel 3:10- Samuel tanur ya Eli putir den mapang tatsüka aliba mapang Tsüngremi Eli Putir den mapang talangka mejembiba-i liasü, saka Tsüngremi tanur Samuel ajanga jembiba liasü. kechiaser tanur Samuel dak Tsüngremi temulung doka liasü. Tsüngremi Dawid Chuba asütsü shimba 1 Samuel 16:12 - Aser kibubai Samuel tang ashi, "Aramesoang, pa dak totzü mezüjang, kechiyong ibaji pa lir." Tetezü Tsüngremi chuba asütsü shimtetba nisungji iba nisung lir ta metetdaktsü. Ainkar Nathan, ainkar Ezekiel, Yohan Babitsüba, Tenyar Paul, shiba dang Saul ta jaa liasü, parnok ajaki mapang balala nung nüburtem atema Tsüngrem den jembiba liasü. Yisu nütsüng rongnung samaruba shiba dang Peter ta ajar, kenü anogo pai Tabitha ta ser tetsü ka teti lai tangar nem angati agüja yaria liasü. Saka kenü anogo la shiranga süadok, saka Peter arua tetsürtem takdang nungjagi ajak tugudaktsü aser apudaka sarasadem, aser ashi Tabitha shishiang ta ashitang lia tenük lapok, aser lai Peter ngua shishir amen. Peteri la teka nung amer noktadkatsü aser temeshipurtem aser amitsürtem jaa la taküm meyipa agütsü. T. Mapa 9:40-41. Yamaji asenok daka tamang tang lirbo asenokia inyaktsü akok, aser chichiba, shidakba agi sarasademra Tsüngremi angashitsü aser iba jagi tesüngmangtsü mapa tulu inyaktsü. Sarasademba ya Tsüngrem den jembiba o lir. Elija o Ahab chuba nati Baal Tsüngremji shidakba Tsüngrem asü, mesüra Elija aser Israel Tsüngremji shidakba Tsüngrem ta toktepba asenoki mezüng chubatem 18:38-39 nungji angur. Idangji kibuba mi-ji anüng, süng, ali aser Külentzü nung tzü atsünga aliba ajakji menakrepa arong ta shia angur. Aser kodang nisungtemi aji angu, parnoki ali nung aputaka ashi, "Kibubaji tsüngrem, kibubaji Tsüngrem" ta ayimten. Aji-sünung Elija-i Tsüngrem tang sarasademba pai aser Israel purtemi amangba Tsüngremi shidakba Tsüngrem ta Baal Tsüngrem külemertemdang jakdaka sayutsü mechi nung azüngashia sarasadem, aser pa Tsüngremi idangjisa jakdaka jongkai mapa agi inyaka sayu. Aser yamajisa Elijai küm asem ser ita terok alima nung tsünglu marutsü atema sarasadem aser yamaji atalok. Anungji sarasademba ya Tsüngrem den nungdak atema sensaksema o jembiba lir mezüng chubatem 17:1. Aser ano Elisha ainketeri sarasademba ajanga sayatenya tulu aika Tsüngremi pa pu küma inyak, item sayatenya mapatem ya tanapuba chubatem tapu nungji shia angur.

Akhi asen tetsü tebou mapang nung Arasentsür "Witches" kar ajanga par limapur Tsüngremtem den nüburtem atema tongtepratepa jembiba liasü, iba kuli-ji kar yangi agütsür. Asen tetsü tebou jungli yimti lima alidang Arasentsür Ongangla- ta ser ka liasü ta otsü-i ashir, anungji la ajanga yimti nung par Tsüngrem den tongtepratepa jembiasa liasü ta ashir. Iba tensa mapang nungji mapang shia nüburtem shirang korang timtem tulu ataloka liasü, aser ano yimtsüng nungji yimchiyimjung melena sensak tia nung nüburtem kangasa timtema liasü ta otsü-i ashir. Iba tensa mapang nungji yimteni senden tulu ka ayongzü, aser Arasentsür ongangla tang jagi yimer tia asüngdangi aotsü pangjemtep. Yamaji Ongangla tang jagi oagi yimer tia tensa indangji asüngtangtep nung Oronger "Saku" tetezü "Mangko" agi tzüsen tzüpo külemang ta shina liasü. Yamaji yimertemi oronger saku "Mangko" alepi ao aser mangkoji lepa bener aruagi ashiba ama tzüsen tzüpoji külema meshitet. Iba sülenjibo par yimtsüng nungji shirang korang ajak anena dok aser tsüksüng-ensüng nung renloka tajungba küma ao ta otsü-i ashir. Yamaji Arasentsür Ongangla ajanga yimertem asoshi mapa tajung par Tsüngrem den tongtepratepa jembitepja yimti nungji yimchiyimjung bener arutsüba atema par yimertemi la nem ken ka mejema tentsü. Kenji yamai; O'Jungli yimti kongnung, mongdang ayim ale, nütsüng temang senden angda, nütsüng temang sendena yuli, Tsüngrem kümer Ongangla tang jagi, Am tok amsü oni, tzüsen tzüpo külemangda. Tzüsen tzüpo külemteta yule, orong saku agi, yimrong susang tuten oni. Oh! ho, ho, ho, he! Ta tentsü. Yamaji iba anogo nungjagi iba kenji tanü tashi Moatsü, Tsüngremmong benjong mapang kanga longsutepa tenyongasa aru, aser tanü tashi iba kenji senti perem ama rizünga tenshia arur.

Yamaji asen Ao lima nung asen tetsü tebou mapang nunga Arasentsürtem ya kanga temezüng "Exact prediction for the future" or "fortune teller" kar adoka liasü ta otsü-i ashir. Iba mapang ya, iba ama Arasentsür kanga buluabo mali asü ta otsü-i ashir. Anungji Arasentsür temezüngerji bushia mapang shia Azünglen nungi ongpanglenisa atua liasü aser ano mapang ka nungbo Ongpanglen nungi Azüngleni Arasentsürji bushia alu ta otsü-i ashir.

(Maneni taruba adok nung...)

## ANOGO ABEN TSÜNGREM DEN

### TENÜNGSANG AGI NÜ DANG AGIZÜKTSÜ YARIR

Anogo ka nung ni tenetben nü nüng asanger, kechiaser Nü ochi obendang lir. T. Ken 119:144

Tenüngsangi agütsüba tepela teka nai kecha nung mangutsü. Tetenzük nungi tenüng asangba lenmangji Tsüngremi sadema yanglua yutsüba lenmang tesatemji yanglu ta Laishiba nung ashir. "Nisungtemi kü tenüngsang yoktsü asoshi kü atema ni parnok yanglu" (Isa. 43:21). Tenüng asangbaji tanelaren inyaksangshiba tobur tajung mapa ka lir. Iba jagi Tsüngrem tauchi angatetta taküm lidaktsür. Iba yagi asenok ajemaludaktsür aser kasa mapang nung asen tsükchir tobur raksatsür.

Tenüngsang mapaji asenoki tanela nung koda tarokba nung angatettsü iba lenmangji ka lir. Dawidi Tsüngrem O ochi bendang asoshi ka sülen ka ta tenüng asang. Iba jagi pai Tsüngrem O ji tali tarokbai ia angatetta liasü. Nai kodangsa nai O nungji Tsüngremi nü dak kongshia aruba nü mulungjangi aiter, iba mapangji nü teka aser nü mulungjang lapoka ibaji agizüksüla.

Tenüngsangi O nung nangzüka aliba tenangzükbatem agizüksü nü dang yarir. Tenüng asangbaji nü taküm nung mezüngbuba mapa südakjang aser anogoshia tia ajak nung ibai inyakang. Aser tepela agi nü mulung asüngba aser sayatenyaji repringang.

Tsüngremi Pa O nung agütsüba mapatem junger ta agizükang. Tsüngrem O aser Pa tenangzükbatem mejangrai teli. Tenüng asangba sübutsü sobuang aser nü tejen sübutsü kü nem tokjang.

#### SARASADEM:

O Oba, Nü chir zü ajanga kü süoshi, tenüngsang makaba süoshi, tenüngsang akaba süoshi agi melentsü nung Nü tenüng asanger. Teti iba sobutsü sübur alitsü kü dang yariang. Amen.

## Mokokchung District Jail Fellowship kilem yanglutsü



Mokokchung District Jail Fellowship anasa Yimyu Baptist Arogo sannüker, Puryapang, Mokokchung District Swachh Bharat Mission Chairman, M. Bendangnukshi Longkumer aser Mokokchung District Jail Fellowship Chaplain, Moa Walling nungertem agiba noksa angur.

**Dimapur, May 30 (TYO):** Mokokchung District Swachh Bharat Mission ketdangsüba kübok Yimyu Baptist Arogo-i teyari agüja Mokokchung District Jail Fellowship indang kilem yanglutsü.

Taküm April 4 nü water supply & sanitary facility lapoktsüba mapang jail nung alirtemi SBM Mokokchung dang Jail Fellowship indang kilem yanglutsü atema mepishia asüngdanga liasü.

Square feet 800 tasazük chapel indang kilemji kanga mejunga raksar liasü aser tzünglu arudang tzü senoka aita liasü saka Yimyu Baptist Arogo-i CGI sheets tasen enoktsüogo.

Yimyu Baptist Arogo-i CGI sheets agütsüba dang masü saka mapa inyakra aser iba nung sen aoba ajak agütsü.

Tang Mokokchung District Jail nung nisung 38 puoka lir aser parnoki teti Fellowship nung adener.

## China nung arogo 2 nungi electricity agien

**Wenzhou/Zhejiang, May 30 (Agencies):** China nung tamangba yimsü tsütsü tensa mejungi kümer aliba mapang ka nung Zhejiang province nung ketdangsertemi arogo ana indang electricity supply agienogo.

Arogo ana jagi security camera enoktsü tetuyuba sülen manidakba atema ketdangsertemi iba mapa inyakra.

May 24, 0217 nü Wenzhou, Zhejiang nung Fire safety department-i Gesancun Church nem shidi ka agütsüba nung, züngsem 400-500 aliba arogo nung nisung onsara aser mi dak sendakba lendongtem ataloktsü ana nung lir, ta shia liasü.

Iba nung ajemdaker sorkari


power aser water supply agientsü aser arogoi tetuyuba agüja aliba ama inyakang ta takhangba agütsü.

Arogotemi surveillance cameras enoktsü memulungba anema iba mapa ya inyaker, ta Khristantemi ashi.

Ajisüaka, Gesancun Church-i sorkar tetuyuba magizüker aser parnoki diesel generator ka alia sentep maneni agidar.

"Onoki surveillance cameras meinoktsü atema onok tajungtiba agi mapa inyakdar, saka sorkar den toktepa aotsü atema arogo dak tashi peria mali. Sorkari iba dak alia tashiyim mapa kar inyakra, onoki kechi meshitetsü" ta arogo nung züngsem kati ashi.

**OLONG PAITEP # 4436**



<b>TIPILEN</b>		<b>LANGTSÜNGLEN</b>	
1. Mepela/korem	- (5)	2. Mesük	- (3)
5. Tzü agi metener	- (3)	3. Miima anük	- (3)
6. Mi mejangrui aküm	- (4)	4. Telemsa	- (6)
9. Teintet	- (4)	7. Tamachi / Yiar	- (5)
11. A _ _ _ lang	- (3)	8. Arem ak	- (6)
12. Shisatsü tatsü	- (9)	10. Ali nung temokok-i tangshi	- (6)
13. Tsük asepdang amshiba	- (3)	11. Ken olasü	- (5)
14. An_ _ _ _ len	- (4)	12. Longren-tenem masü	- (6)
16. A _ _ _ _ tsübu	- (4)	15. O _ _ _ a	- (3)
18. Itsük takong	- (3)	17. A _ _ _ len	- (3)
19. Nisung aika	- (5)		

**OLONG PAITEP # 4435 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Asang, 3. Kimen, 6. Ejak,		1. Asangwa, 2. Nangzük, 4. Mejang,	
7. Nüngo, 9. Anen, 11. Nütsüng,		5. Nok, 8. Asa, 9. Anüolen,	
12. Azük, 13. Golab, 14. Yagi,		10. Nembang, 11. Nüngja, 14. Yim.	
15. Moapu, 16. Anüng.			



**ALOKBA DEN TSÜNGREMI KODAK NUNGI AOER ASOSHI JEMBIR**

**Tsüngrem :** Kü tenzüker Alokba, na ajanga ni nenok Aoertem dang item o ya shiang.

- Nenok Aoertemi ano revival tulu ka meshia kü dang sarasademer, saka nenok Aoertemi revival dang nungibo Moatsümong, Tsüngremmong komaka metsünga reta mongtepsü dang asentenshiteper.
- Ano nenok Aoer Rev, Pastor tem danga yamai shiang....parnoki moatsü sentong aser Tsüngremmong sentong nung oa dena kü dang sarasademba yaagi joko ni nüra nüraa alaker, Ni manganüra ta ajangajanga shiang. Ak matsüngdang perem entok ta shiang. Kechiaser nenok ola agibo junger, saka nenok mapaji kü tsüngdang memeshiba agi sünga lir.
- Ni nenok Aoertem dang ni mepelaba aika ashitsü lir, saka tanübo iba tashi yang shidi. Tatem nung nenok Aoer Aotsürtemi anosa Moatsümong Tsüngremmong ya metsünga mongdi süra, tang ama ya Moatsü mongli Ki rongli, Tsüngremmong mongli yi agi mesepli gari lendong nung tsükseta südaktsüli ta ni nenok Aoertem dang kü mangyangba teti alitsü ta shiang.

**Alokba :** Kü Kibur, Na taochi agi sünga aliba ta ni metet, anungji nai kechi ozü nüburtem dang shiang ta asür, aji ni shidi.

**Lilir: I. Meren Lemtur, Tzüdikong**

**TANÜBO NAI LANGZÜANG**

Q. India tsür shibai 2017 Little Miss Universe tetoktepba nung shilem agitsü ?

- [A] Vinita Sayal [B] Rajeshwari Dyal  
[C] Padmalaya Nanda [D] Nandita Das

(Taruba adok nung onoki langzüsü)

**YASHI ADOK TELANGZÜBA : Italy**

**Tepela Tasoba Anogo**

Tanur asoba anogo nung salem osang den noksa angali adokdaksünura - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimim bureau tem nung agüjang.

1. Tenüng : .....  
2. Tasoba anogo: .....  
3. Küm : ..... 4. Class : .....  
5. School : .....  
6. Talidak : .....  
7. Salem osang : .....

**NAIA YA METETER MA**

2017 küm India nung Medical College tajungtiba 10



- All India Institute Of Medical Sciences (AIIMS), Delhi
- Armed Forces Medical College, Pune
- Christan Medical College, Vellore
- St. John Medical College, Bangalore
- King George's Medical University, Lucknow
- JIPMER, Puducherry
- Grant Govt. Medical College & Sir J J Group Of Hospital, Mumbai
- Seth GS Medical College & KEM Hospital, Mumbai
- Institute Of Medical Sciences, Varanasi
- Kasturba Medical College, Manipal

**SUDOKU # 3549**

2		8	6	4				
6	3	6	9				7	
	4	9	2				1	
7					3	6		
2		5	8					
6		7	3					
			2	8	5			
8						3	5	6
5	3	1	7	2	6	4	3	2

**TELANGZÜBA # 3548**

3	9	1	8	2	4	6	5	7
2	5	8	6	7	1	4	3	9
7	4	6	3	5	9	1	2	8
1	2	4	5	8	6	7	9	3
6	8	3	4	9	7	2	1	5
9	7	5	1	3	2	8	6	4
8	1	7	9	6	3	5	4	2
5	6	9	2	4	8	3	7	1
4	3	2	7	1	5	9	8	6

**OJANG LUTEP # 4044**

- ALANAGND :   
 EN TSA :   
 PAMANG :   
 ANTG :   
 NGDA :   
 UNNGI :   
 TANGMAJUBA :   
 GAI :   
 LEMENER :   
 ÜTASSÜ :

**OJANG LUTEP TELANGZÜBA # 4043**

MEJANGJABA NISUNGTEMI BANK DAK SENDAKBA ASÜNGDANGYA DANG KANGA JUNGA LANGZÜTSÜLA

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



**Aries**  
21/3-19/4

Nai mapa kar nung lenir shilem agitsü bilemstü aser iba ajanga nü den külemi inyaker kar temolung mepeladaksütsü südi. Anungji nai meilongi inyakang.



**Taurus**  
20/4-20/5

Nai tanü mapa bendanga agütsür inyakba ajanga tangar tsüngdang ajemalutettsü. Saka nai tashi masü jembishinü nung temolung tali agüjang.



**Gemini**  
21/5-20/6

Nai maparen kar nung tongti shilem aginüra mapa tali inyakang, mesüra junga jembishinüang. O jembitsü aliba mapa kar bushia inyak tajungba asütsü.



**Cancer**  
21/6-22/7

Shishilembaba maparen nung nai ketdangser shilem inyakatsü junger. Saka kibong nung iba yimya amshira timtem ajurutsü südi.



**Leo**  
23/7-22/8

Tanü nisung aikati nü dak temolung malemstü. Anungji nai bilemba ajunga tangar den lemsatepdang kümdanga jembishinüang.



**Virgo**  
23/8-22/9

Tanü nai tongti shilem magi nung tajungba asütsü. Nai tangar den külemi mapa meinyaknüttsü südi, anungji ketdangsüba mapa inyakang.



**Libra**  
23/9-22/10

Nai lokdi nung shilem agiba ama maparen kar nung meinyaktettsü südi. Anungji nai ketdangsüba shilem agidang kanga kümdangang.



**Scorpio**  
23/10-21/11

Nai mapa meranga inyakba ajanga nisung aikati nü jakla meteta lir. Anungji nü dak tashi alitsü jenjang bushidang jungjunga bilemdangang.




**Sagittarius**  
22/11-21/12

Nai khuret maginüba ajanga aiben lenir shilem mebushir südi. Anungji nai nisung kar yariang aser parnok nem lenir mapa inyakdakjang.



**Capricorn**  
22/12-19/1

Nai lenir jenang nung meranglokdang tesüiba otsütem bilemtetang. Molungsentsü tamajung aliba nisungtem den tokteptsü nai memerang tajungba asütsü.



**Aquarius**  
20/1-18/2


Nai aiben temelenshi tulu bener arutsü jangrar, saka iba temelenshi arutsü mapang nungdaker. Na nokdaka aliba nung kümdanga jembishinüang.



**Pisces**  
19/2-20/3

Terenlok aliba mapa nung masü saka nüburttem anitsü jenjang ka nai bushiang. Nai o kanga junga jembitettsü saka mapang kümdanga amshitsü nungdaker.

## Otsü dang jungra ni Marathi film tem produce süner: Hrithik



**Mumbai, may 30** Marathi film yanglurtemi (Agencies): Actor Hrithik Vikram-i iba film ajanga ni puaba ama mepuatettsü."

"Film otsü jagi ni jangradaktsüra ni Marathi film tem dena produce süner," ta Hrithik-isa ashi.

Designer-director Vikram Phadnis indang Marathi film 'Hrudayantar' trailer sayaba mapang pa Deobarnü densema liasü.

Marathi film tem nung inyaktsü asoshi sensaksemba mapang Hrithik-i ashiba agi, "Iba film ajanga kanga kongshiogo.

shisabulu aser temeim meimchirtemi ajangshiba ajak densema lir," ta paisa ashi.

"Ni film tulu ka nung shilem tilaka agir. Iba film nung nung ni angazüka idangtsüsa scene tem nung o jembiba ali asübo kanga jungla. Saka ni agiba shilem ya ojang kata mejembiaka kanga dang junga sayutetogo kechiyong iba shilem nung ojembitsü asoshi kecha nungdaka maliasü. Tia maka ni Marathi oshi arantgetshitsü asoshi maongka mangu," ta film nung pa shilem indang jembidang Hrithik-i ashi.

Hrudayantar film nung nungtugu Marathi actor Subodh Bhave, Mukta Barve aser Sonali Khare nungeri tongti shilem agir aser iba film ya July 7 nü sayatsü.

Hindi film indang jembidang Hrithik-i ashiba agi, Krrish 4 nung tetsürtem rongnungi tongti shilem agitsü asoshi tang tashi telemtetba magi-i lir.

## Hollywood nung shilem agitsü jangrar: Radhika Apte


**New Delhi, May 30** (Agencies): Actress Radhika Apte-i Hollywood mesüra British film industry dang masü saka world cinema nung shilem aginür, ta metetdaksü.

"Ni Hollywood nunga shilem aginür, saka ni world cinema nung shilem agitsü kanga jangrar. Iba asoshi ni alizüng yua lir aser langka ka ajurutsü imlar" ta Radhika-i ashi.

2005 küm 'Vaah! Life Ho Toh Aisi!' film nung shilem agiba ajanga Radhika-i film industry nung tetsüng ajemok. Iba sülen lai Shor in the City, Kabali, Phobia, Badlapur, Manjhi - The Mountain Man aser Ahalya film tem nung shilem agiogo.

La ya Pune nungi lir aser la London nung kinungbo Benedict Taylor den telidak lir.

"Ni Badlapur, Hunterrr, Manjhi - The Mountain Man aser tang Padman amala commercial film tem nung shilem agiogo. Commercial aser



non-commercial tsüngda tepila kangabo mali. Tang asen linük nung tetsürtem asoshi jenjang tajungba akümer. Tarutsü nung ni film tajungtem nung shilem agitsü maongka angutsü imlar" ta laisa metetdaksü.

Radhika Apte-i tang Padman film nung tagidak lir aser iba film ya jenjang dalang

'sanitary napkins' yanglutsü atema nisung kati mapa inyakba indang otsü lir.

Film yanglur R. Balki-i Arunachalam Muruganantham indang taküm otsü nungi agiteta Padman film yanglur.

Iba film nung Akshay Kumar, Sonam Kapoor aser Radhika nungertemi tongti shilem agir.



Hombarnü New Delhi nung Bata footwear-i tetsür aser teburtem indang tsüngsem tasantem sayaba noksa nung angur.

## TAN HOPTA ATEMA - KOMA SÜLA ?

Q Central government-i Nagaland nung nashi maleptsü aser shibelen mesüdaksütsü asoshi army nem tashi agütsü nunga koma süla ?

Olong 20 shi nung June 02, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

## Camera ana aketba OnePlus 5 phone June nung sayatsü



**May 30, 2017 (Agencies):** aketba phone mezüngbuba Nai Android aketba smartphone mesüra OnePlus 3/3T alitsü bilema lira, khen ataa liang. China nung phone yangluba OnePlus company ajanga June ita nung OnePlus 5 sayatsü sentong lir. Iba smarphone tesülen camera ana keta lir aser India nung Qualcomm Snapdragon 835 processor

Iba phone indang batter ya 4,000mAh lir, ta ashir.

OnePlus 5 phone nung internal memory ya 64GB aser RAM ya 8GB alitsü, ta osang ajanga ashir.

OnePlus 3T aliba nung company ajanga sen 1,500 meyiba agütsür. OnePlus 3T phone alidang sen meyiba agütsüba ya OnePlus India Store nung SBI credit card ajanga aliba nung lir.

OnePlus 3T smartphone ya OnePlus 3 yanglushiba lir. OnePlus 3 ya 2016 küm June ita sen 27,999 agi saya liasü. Iba phone ana tereprangtsü kasa dang lir saka OnePlus 3T nung processor tasenba, battery tashi taitba aser tejaklen camera tajungba lir.

## Uzbekistan nung game 32 nokdangogo



**May 30, 2017 (Agencies):** Osang ka ajanga ashiba agi, Uzbekistan nung computer game aika nokdangogo. Parnoki ashiba agi item game tem nung lendong keta lir.

Computer game ajak senteper 34 nokdangtsüogo aser item rongnung alima ajunga nung kanga nungtugu süa asayaba game; Grand Theft Auto: San Andreas (GTA), Call of Duty: Black Ops, Silent Hill, Resident Evil, Mortal Kombat aser Doom

nung densema lir, ta kasa osang ajanga metetdaksü.

Iba tenokdangba ajanga Uzbekistan nung item game tem tanga linük nungi bener arua ayokba maparenji ozüng alema inyakba maparen ka kümdaktsüogo.

Uzbek ketdangsertemi ashiba agi, item game tem ajanga ozüngalema inyakba maparen balala, pornography aser libaliro aser yimden yimsüsüba mesüngjemi kümdaktsütsü asoshi

tajungshiba agütsütsü akok.

Parnoki maneni iba ajanga yimjung aser tamangba yimsü balala tsüngda aser kin o kin na tsüngda tesunep nung aliba raksatsütsü asoshi tsübua bilemer.

Iba game nokdangba ano tanga kuli kaji, item game tem ajanga Uzbekistan indang osang tai agütsütsü akok aser

parnok indang otsü, sobaliba aser tamangba belensatsütsü akok.

Iba tenokdangba ya sorkari lanurtem teraksatsüba yimya balala agi parnok atsür aotsü nung kümzüka ayutsü asoshi maparen balala inyaka aruba nung shilem ka lir.

Item game tem timba ka kanga dang nungtugu lir aser linük ajunga nung internet café tem nung kanga bolua angur aser Russia oshi nunga pirated copy tem DVD nung angur.

## Sanjay Dutt Total Dhamaal nung shilem magitsü



**Mumbai, May 30 (Agencies):** Actor Sanjay Dutt mazüngba ajanga Total Dhamaal nung shilem agitsü aliba thitemogo. Aji dang masü film nung asayamenü tapet masüba kar aliba ajanga pai iba film nung shilem agitsü songtemtsü, ta osang ka ajanaga metetdaksü.

Sanjay-i taküm küm

tetenzüklen Bhoomi film tangokba tembangogo aser pa ano Torbaaz, Saheb, Biwi Aur Gangster 3 aser actor-film yanglur Ajay Devgn den project ka nung külemi shilem agitsü asoshi sentong lir.

Taoba mapang Dhamaal aser Double Dhamaal nung pai tongti shilem agia liasü saka pai taruba Indra Kumar indang

Dhamaal film nung shilem magitsü asoshi lemtetogo.

Dhamaal film tasembuba Total Dhamaal ya taküm sayatsü asoshi sentong liasü saka Sanjay iba film nung shilem magitsü asoshi telemtetba agiba ajanga maparen tera atsüzükogo.

Iba keno dak sendakba nung osang ka ajanga ashiba agi, Sanjay iba film nung mazüngba kicha agi masü saka tanga kuli kar densema aliba ajanga shilem magir.

"Pa mazüngba den külemi, Sanjay-i film nung asayamenü tepet masüba kar aliba ajanga iba film nung shilem magir. Pai film nung tapet masüba asaya menütem par chirnurtem nem mereprangdaksüner," ta kasa osang ajanga metetdaksü.

Sanjay'er tanur asem lir; jala Trishala aser Iqra aser jabaso Shahraan.

## South Korean Telecom Company kati Chhattisgarh nung Manufacturing Unit ka amenoktsü

**May 30, 2017 (Agencies):** Chief Minister Raman Singh den senden ka akaba sülen South Korean telecom company kati mobile phone manufacturing unit ka Chhattisgarh nung amenoktsü asoshi telemtetba agiogo, ta ketdangsertemi tanü metetdaksü.

"Chhattisgarh ya mineral balala nung kanga dang takar lir aser iba state nung investor tem nem sen indokdaksütsü nükjidong nung Singh-i anir teshimtetba nisung telok ka South Korea-i ogo," ta public relation nung ketdangser kati tanü ashi.

State nungi teshimtetba purtem rongnung, state sorkar ketdangsertem aser industrialist tem parnok kar yashi South Korea yimtiba Seoul tongogo. Parnok Incheon airport nung South Korea nung India Ambassador Vikram Doraiswami-i agizüka liasü, ta paisa ashi.

"Mezüng anogo nung parnoki Seoul nung investor tem den ajurutepa liasü. Sung Ha Telecom company nungi teshimtetba purtemi Shing den ajurutepa parnoki mobile phone manufacturing plant ka Naya

Raipur nung amenoktsü asoshi telemtetba agiogo. Naya Raipur ya Chhattisgarh capital tasenba asütsü," ta paisa shisem.

Sung Ha Telecom ya Korea nung Cellular Phone shishilembaba nung company tulutiba rongnung ka lir aser parnok ya iba maparen nung küm 15 tashi kanga dang high-skilled experience lir, ta pai maneni shisem.

Senden akaba mapang Singh-i, Chhattisgarh nung shishilembatsü asoshi ajungba aser policy tajungba aliba ajanga iba state ya kanga kera electronics yangludak tesem ka akümba osang agüja liasü.

Maneni parnoki Sungam Smart city semdanga ketdangsertem den ajurutepa liasü aser Naya Raipur yimti aser Sungnam yimti na yimya aisü nung kanga mesüktepa aliba ngutet, ta pai ashi.

Item teshimtetba purtem May 28 nü Rajput nungi Seol aser Japan-i state nung terenlok asoshi sen indokdaksütsü nükjidong nung ao aser iba ajanga lanurtem nem mapa inyaksü asoshi maangka agütsütsü, ta ketdangseri maneni shisem.



Madrid, May 30: Madrid nung "The Mummy" film ajungketba sentong ka nung Actor Sofia Boutella, Tom Cruise aser Annabelle Wallis (tabelen nungi techichi) nung tangokba noksa nung angur.

## Snapdeal-i sen crore 113 dak tali bendena lir

**May 30, 2017 (Agencies):** Snapdeal ya Flipkart dang ayoktsü jembiaka Nexus Venture Partners aser Kunal & Rohit Bansal nungi iba company nung sen crore 113 bendena lir.

Nexus Venture Partners nungi sen crore 96.26 inoktsü, Bahl aser Bansal nungi sen crore 16.9 inoktsü, ta Ministry of Corporate Affairs ajanga ashi.

Iba share ya 2017, March 10 nung lezmüktsü. Bahl & Bansal-na nem 1,300 Series J share aser Nexus nem 14,810 preference share agütsü, ta kasa sandong anajanga ashi.

Flipkart aser Amazon nungi kanga toktepa ajanga iba sen ajanga Snapdeal kobika wazüka ayutsüar memetet.

Nexus Ventures Partners aser Snapdeal dangi email yok saka telanzüba kicha mali. Snapdeal ya ita eshika tejaklen

sen agi timtema liasü aser iba mapang iba company nung inyaker nisung aika mapa nungi anentsü aser 'non-core operation' tem anendakja liasü.

Snapdeal nung sen timba invest süa aliba telok ya SoftBank lir aser iba telok ya kanga mazüngi Snapdeal ya Flipkart dang ayoktsü asoshi telok ana tetsüngtai ia maparen inyaktepa mapang lir.

Snapdeal ya Flipkart dang ayoktsü asoshi maparen timba inyaka odagi aser Board nung züngsem tem-ia iba firm ayoktsü molungogo, ta osang angazüker.

SoftBank-i Snapdeal nung sen invest süa aliba ya billion \$1 dak tali lir, ta ashir.

Snapdeal ya 2016, February ita nung jenjang billion \$6.5 liasü, saka dang iba company ya Flipkart dang yokra sen billion \$1 agi ayoktsü südi.





Mongulbarnü New Delhi nung 2014-15 aser 2015-16 indang Raksha Mantri indang sempet agütsüba sentong nung Union Minister for Finance, Corporate Affairs & Defence, Arun Jaitley-i o jembiba angur. Noksa nungsa Minister of State for Defence, Dr. Subhash Ramrao Bhamre, the Secretary (Defence Production) Ashok Kumar Gupta aser Vice Chief of Army Staff, Lieutenant General Sarath Chand nungertem angur. (New Delhi, May 30)

## Babri Masjid ken o nung Advani, Joshi, Bharti nunger dak tai tongloktsür

**Lucknow, May 30 (Agencies):** 1992 küm Ayodhya nung Babri Masjid raksatsütsü atema tasa atongba nung shilem agi ta CBI okadak kati taoba deputy Prime Minister LK Advani, BJP lennir tejen MM Joshi aser cabinet minister Uma Bharati nunger dak tai tongloktsüogo.

Ajisüaka, par asemprongla Rs 50,000 personal bond tem nung bail temelaba agütsüogo.

Mongulbarnü okadak ken o angadangtsü tenzükdang, tai tonglokja alir nisung 12 atema okatsüri Advani aser tanüingba nisungtem indang bail application ka benokba okadaki agizük.

Iba sülen okatsürisa application tanga ka benok aser iba nung, parnoki tasa tamajung atongba onük agienang ta mepishia liasü saka ibajibo CBI obendangeri magizük. Obendangerisa iba ken o nung arlla tasen ka enoksem aser ibaji IPC nung Arlla 120 B lir.

Advani, Joshi aser Bharati nunger dak alia tanü BJP MP Vinay Katiyar, Sadhvi Ritambara, Vishnu Hari Dalmiya, Ramjanmabhoomi Trust chief Nritya Gopal Das, Ram Vilas Vedanti, Baikunth Lal Sharma (Prem Ji), Champat Rai Bansal, Dharma Das aser Satish

Pradhan nungertem okadaki aru. December 6, 1992 nü Babri Masjid raksatsüba sülen FIR agütsüba nung parnok ajak ya tenüing teta zülüoka lir. Parnoki telok ajungmeso aser iba tekülem ki raksatsütsü tasa atonga inyak ta FIR nung tai tonglokja lir.

Babri Masjid raksatsüba indang FIR tongtibaji karsewak lakh aika anema lir aser tanga FIR ka nung tanü okadaki aruba BJP lennirtem dak tai tonglokja lir.

BJP lennirtem indang ken o ji Rae Bareli nung aser karsewak tem indang ken o ji Lucknow court nung benoka angadang. Ajisüaka, 2001 nung CBI okadak kati BJP lennirtem anema benokba ken o nung tasa tamajung atongba onük agentsü aser 2010 nung Allahabad high court-ia ibaji pusema nungit.

Ajisüaka, Supreme Court-i April 19, 2017 nü tasa tamajung atongba onükji meyipa repringshi aser ken o ji Rae Bareli court nungi Lucknow court-i belena liasü.

Supreme Court-i special CBI court dang ita ka tsüingda ken o tem benoktsü mapang agütsü aser iba jagi CBI court-i ken o angadanga arudar. SC-isa iba ken o ya küm ana tsüingda

tembanga angatsü tetuyuba agütsüogo.

Mongulbarnü Advani aser Joshi na Delhi nungi Lucknow-i arudang BJP lennirtem aika adenshia liasü aser deputy CM Keshav Maurya o cabinet minister tem- SP Sahi aser Ashutosh Tandon nungertemi Amausi airport nung tena pela agizük.

Iba sülen Uttar Pradesh Chief Minister, Aditya Nath Yogi-i VVIP guest house nung tena den ajurutep aser idak nungjagi Indiranagar nung aliba CBI court-i ao.

Tanep iba ken o mangadandang, BJP MP Sakshi Maharaj-i "Ayodhya nung Ram temple yanglutsüba alima nung tashi kechaia menokdangtetsü" ta ashi.

Babri Masjid aser Ram temple indang ken o aotsütepba ya anenadoktsüla. Taoba mapang Ram temple yanglutsü anema nokdangertem tang Ram bhakts kümogo, ta Maharaj-isa ashi.

"Muslim nungertemia Ayodhya nung Ram temple yanglutsü mulunger. Alima nung tashi kechaia Ayodhya nung Ram temple yangluba menokdangtetsü" ta paisa metetdaksü.



Mongulbarnü Guwahati nung Health Ministers of North Eastern states 1 buba conclave nung Union DoNER Minister Dr Jitendra Singh-i osangbener den sensaksemba noksa nung angur. Iba sentong ya Assam Health Department, NEC aser DoNER temi ayongzüka agir. (Guwahati, May 30)

## Kashmir nungerji India sensotem: Rajnath Singh

**Meerut, May 30 (Agencies):** Jammu and Kashmir state indang khurettem angatetteptsü atema sorkari akokba tashi mapa inyakdar, ta Home Minister Rajnath Singh-i tanü ashi.

"Kashmir, Kashmiri aser Kashmiriyat ajakji India nung dena lir" ta pai metetdaksü.

Ajisüaka, Rajnath-i sepaitem amakba inyakim aija jembidang, "jawan tem amakertem anema mapa inyaktsü" ta ashi.

Narendra Modi'er sorkari ochimashi aser kiralongraba azüoktsü atema mapa inyaker. India-i alima nung linük

tongtipangtem den kiralongraba dak sendakba aser ozüing alema sen bendenba osangtsüsang belenteptsü atema tenangzüktep balala agiogo, ta paisa metetdaksü.

"Tangbo India-i bendang linüktem nungi osangtsüsang agiteteter aser ibaji ajanga sorkari ozüing alema bendenba sen ngutetogo" ta Home Minister-isa shisem.

Osangbeneri taüba küm asem tsüingda BJP-i aniba NDA sorkari kechisa inyakteta lir ta asüingdandang, "sorkari takok ngua mapatem inyaka arudar" ta Rajnath-i langzü.



May 30, 2017 nü Rashtrapati Bhavan, New Delhi nung Tir Pranab Mukherjee-i Year 2015 atema Hindi Sevi Samman Yojna Awards agütsüba noksa nung angur.

## Chhattisgarh nung Maoist temi bus ka rongtoktsü

**Raipur, May 30 (Agencies):** Maoists telungpurtemi Chhattisgarh kübok Narayanpur district nung bus nung mena aliba nüburtem bus nungi aludaktsüba sülen rongtoktsü. Kasa mapang nung Mongolbarnü police den mangatettep adokba sülen telungpur parnok 7 temeket tesem ka nungi puogo, ta ketdangseri metetdaksü.

Yasüing Narayanpur nungi Orchha-i oya aliba nija bus ka Maoist pur telok kati state yimtiba nung km 300 shi pilar aliba Jhorigaon yimtsüing ana soit. Parnok rongnung karibo prangpong amer liasü, ta Superintendent of Police, Santosh Singh-i osangbenertem dang ashi.

Telungpurtemi Bus nung mena aliba nüburtem dang bus nungi alutsü asoshi metetdaksüba sülen iba bus ji rongtoktsü, ta paisa ashi. Bus nung nisung kwi mena liasüar ajibo tejangja memetet saka parnok aja kümzüka lir, ta SP-i shisem. Iba osang angashili sepaitem iba tesem-i yakta ao.

Singh-i ashiba agi, iba tesem nung lenmang yangluba atema Maoist pur memelar aser iba yongji parnoki iba amala maparen inyaker.

"Abujhmaal kübok Narayanpur nungi Orchha tashi lenmang yangluba ya Maoist purtemi anemer. Parnoki iba tesem ya parnok meyong ta bilemer. Lenmang yangluba nung timtem balala agüjaaka lenmang km 66 yanglutsü aliba nungi kilometre 45 bo Indo Tibetan

Border Police (ITBP) aser district sepai tekümzükkba kübok yangluogo. Tanüingba lenmangtema yangludar" ta Shing-i ashi.

Tanga tatalokba ka nung, Mongolbarnü tetsür asem densema Maoist pur 7 Narayanpur anasa yimtsüing ka nungi puogo.

Deobar anepdang züingialia telungpurtem aser security sepaitem Tekanar yimtsüing anasa khatap iba sülen iba khatapba nung densema alitsü ta temolung melemi bilemba ajanga parnok ya apu, ta Shing-i oasng benertem dang ashi.

Pai ashiba agi, bushisüingdangba mapang telungpurtem yagi parnok tanga tatalokbatem nunga densema aliba metetdaksü aser iba sülen parnok Mongolbarnü apu.

Honibar aonung security sepai telok ka Dhanora aser Orchha yimtsüing na tsüingda nung meita aoba mapang Maoist purtemi parnok da Tekanar yimtsüing anasa akha iba sülen telok ana tsüingda khatap tenzü. Aji saka Maoist purtem yakta iba tesem nungi jena oadok. Mapang tatsüka lir tetsür asem densema parnok 7 iba tesem nung bushisüingdangtsü atema apu, ta pai maneni shisem.

SP-isa ashiba agi, Maoist pur dang ashishiba nung, Raipur nungi km 300 shi pilar aliba Dhanora aser Orchha tesem nung parnok inyakim tejangja kar nguteta liasü.

# Baghdad nung bomb ana apok, nisung 27 pokset



Mosul, May 30: Mosul indang Old City district nung aliba al-Zanjili tesem nung 2017, May 30-nü Iraq mitkar aser Islamic State telungpur tsungta raraba mapang nüburtem parnok ki doktsü jena aoba noksa nung angur.

**Baghdad, May 30 (Agencies):** Islamic State telungpur kübok aliba tesem tatembangba, Mosul tanaben Iraq mitkartemi agitsü merangba mapang ka nung bomb ana Baghdad nung apok aser iba lendong nung nisung 27 pokset aser 100 dak tali yiru.

Iba lendong ana rongnung tesashitiba ya nüngtugu ice cream ayokba tesem ka anasa Hombar aonung ayatirm nung apok aser iba lendong nung nisung 16 pokset aser 75 yiru.

Muslim nung Ramadan benjung tenzüker anogo ka süiba sülen iba lendong adaloker. Iba benjung mapang Iraq nung nüburtemi ita ka chi mechiyongi lumir aser anogoshia parnok lumiba mapang temer aonung tesü tashi shishilemba aser lokdi balala adenshia kazüteper.

Iba lendong agütsüba ya Islamic State (IS) temi tenüng agiogo aser bomb

poklochtsüsang ya Iraq nung aser Shiite Muslim nung tepsettsü nükjidong yur inyak, ta parnoki ashir.

Iba bomb lendong indang noksa aser video tem social media balala nung sayua aliba agi, iba lendong ya central Baghdad kübok Karrada district nung aliba Al-Faqma ice cream dokan anasa nisung aika sentepa aliba nung apok. Noksa kar nung ki aser oset poksaba agi yimdong sünga brokshia angur aser noksa kar nung ice cream indang cup nung azü agi melanger ali nung tsüka angur.

"IS kiralongrar temi taonung Baghdad nung tanurtem aser kinungertem külemi ice cream ayokba tesem nung südoksünema aliba mapang bomb poklochtsü. Onok iba temenen anema Iraq den lir," ta IS telungpur den rarar telok nung US envoy, Brett McGurk-i Twitter nung iba lendong aija zülutsü.

Tanabuba lendong ya Mongulbar anepdang Baghdad indang tongti apo anasa adalok. Iba lendong nung car bomb ka apok aser iba mapang nisung 11 pokset aser 35 yiru.

Iba lendong ya shirnoki agütsü-ar tenüng agia mali, saka IS temi teti Iraq yimtiba nung nüburtem dak car bomb ya poklochtsür

IS temi amokbanga aliba tesem tatembangba, Mosul yimti ya Iraq mitkartemi tanaben agitsü asoshi raraba mapang iba lendong ya adalok.

Mosul yimti ya IS tem nungi rakzüchtsü asoshi Iraq mitkartemi rara tenzüker ita 7buba odagi, aser mitkartemi iba yimti anüdoklen aser anülulen tesemtem timba agitetogo.

Mosul nung tang kiralongrar temi amokbanga aliba tesem nung civilian 200,000 junga alitsü südi, ta United Nations ajanga ashir.

# Taoba mapang Panama dictator, Manuel Noriega süogo

**Panama City, May 30 (Agencies):** Taoba mapang Panama dictator, Manuel Noriega süogo, aser pa arishi küm 83 liasü, ta osang ka ajanga ashi. Manuel ya kechi ajanga asiär kuli tejangja agüja mali saka pa ya Hombar aonung asü, ta ashir.

"Manuel A Noriega asüba ajanga otsü tabu ka shibanger," ta Panamanian tir, Juan Carlos Varela-i Twitter nung zülutsü.

US den mapang ka medemer liasüba Panama dictator, Manuel ya 1989 küm America nungeri pa menden nungi aludaktsü. Iba sülen pa miim mozü ken o ka ajanga US nung küm 17 tepuokdak ayu.

Pa menden nungi alur küm 20 junga US aser France indang tepuokdak ayu aser pai 1983 nungi 89 tashi yimsü asüba mapang pa anema nokdaker tem tepsetba ken o nung tang tesüsa Noriega ya Panamanian tepuokdak liasü.

Küm ana asem tejaklen Noriega ya high blood pressure aser bronchitis amala agi



Manuel Noriega (File)

shiranga liasü.

2016 küm doctor temi Noriega indang tekolok nung komo aliba ya kanga kera-a ainer ta butet, pa dak iba komo ya küm pezü tejaklen nguteta liasü. Iba komo surgery agitsü asoshi renemshitsü atema pa January ita nung 'house arrest' asü.

Manuel Noriega-i pa kinungtsü Felicidad aser jala Lorena, Thays aser Sandra nung yutsür süogo.



Rome, May 30: 2017, May 30-nü Rome, Italy nung senden ka nung atentsü aruba mapang Canada Ato Kelonser Justin Trudeau aser Italy Ato Kelonser Paolo Gentiloni-na teka amtepa salemba mapang tangokba noksa nung angur.

# White House communication director mapa nungi anen

**Washington, May 30 (Agencies):** US tir, Donald Trump-i shimer ita asem sülen White House indang communication director mapa nungi anenogo.

White House nung media inyakyim tajungba küma yanglushitsü asoshi Republican telok nung sentong yanglur mongin, Mike Dubke ya March ita shima liasü.

Iba mapa ya White House

indang press secretary, Sean Spicer-i abentsü südi, ta osang ka ajanga ashi.

Dubke-i iba mapa doktsütsü asoshi May 18 nung shia liasü aser ketdangser den mangatettep kicha mali, ta osang ka ajanga ashi.

Trump-i Middle East aser Europe sema jajar aruba sülen iba mapa doktsütsü asoshi Dubke-i molung, ta White House adviser, Kellyanne

Conway-i ashi.

Trump US tir akümstsü asoshi Kremlin-i yari, ta aija aliba ken o FBI ajanga bushisingdangba mapang ka nung iba temelenshi aruba ajanga Trump kanga mepelai lir.

US tir-i anogoshia osangbener den jembiba sentong ya Donald Trump-i agienogo aser tang bo pai ita nung aneben dang osangbener den jembir.



Berlin, May 30 : Berlin nung Mongulbarnü India aser Germany tsungta MoUs/JDIs nung sign sütepa mapang Ato Kelonser, Narendra Modi aser German Chancellor Angela Merkel nati repranga aliba noksa nung angur.

# North Korea-i US nem sempet tuluba agütsütsü amokmeren

**Pyongyang, May 30 (Agencies):** North Korea-i missile tendangba sülen maneni Kim Jong-un-i sempetleb tuluba agütsütsü nangzükogo, aser iba ajanga US aser North Korea tsungta tebilemtsü adoka aliba tuluba kümdaktsür.

Hombarnü ballistic missile ka tendangba mapang Kim-i nüka reprang aser US matsükdang kümzüka alitsü asoshi anu tashi taitba raraba oset yanglutsü totuyuba agütsüogo, ta osang ajanga ashir.

"America mitkar temi North Korea jashitsüsa mapa inyakba anema sempetleb tuluba

agütsütsü asoshi temaba jenjangi ajungkettsü," ta Kim-i ashi.

North Korea-i Hombarnü tendangba missile nung 'advance automated pre-launch sequence' keta lir.

North Korea-i Scud-class missile yanglushir tendang, ta South Korea mitkar-ia ashir.

Hombarnü US supersonic B-1B Lancer bomber den külemi South Korea mitkartem 'drill' agiba osang ka South Korea-i metetdaktsü. Korean Peninsula nung US-i anir nuclear bomb amshia 'drill' agir, ta North Korea-i aitsür.

**KAKET NUNG TEMELENSHI**

Kaket tenüng "The Architect of Nagaland State: A Biography of I. Sashimeren Aier" Tezülur A. Lanunungsang: 2005, kaket tapu ka, mezüngbuba para tatembangba oren nung 'Pongen' ta alibaji aibelena zülusemba ta jangjaogo aser iba ojangji kaket nungi aidoka melenshiogo. Iba temelenshiba kaket zülur ajanga sangdonger.

Sd/-

A. Lanunungsang.

**SC-i Biren'er jabaso ken o June 5 nü angadangtsü**

**Imphal, May 30 (Agencies):** Irom Roger tetsü Chitra Devi-i chief minister N Biren Singh'er jabaso N Ajay Meetai-i par jabaso 2012 küm khasetba ken o okadak benokba June 5 nü angadangtsü asoshi Supreme Court-i telemetba agiogo.

Supreme Court-i taoba hopta Centre aser state sorkar nem osang agütsüba nung aija alirtemi parnok telangzüba Hombarnü agütsüogo, ta osang ka ajanga metetdaksü.

Tanga onüktem dak alaka Roger'er tsüraburtemi ashiba agi, parnok aser par okatsür nisungtemi amokmerendar.

Parnokisa ashiba agi, state police-i aija alisang pusema mapa inyaker. Maneni parnoki tekümzüka meshia liasü. Roger atema okatsüsang Utsav Singh Bains-i telungpurtemi iba ken o tokjang ta phone ajanga pa amokmerenba osang agütsüba sülen state sorkari pa nem security agütsüdar.

Roger'er kibong tenüng nung state nung aliba obendangertemi okatsütsü asoshi magizük ta Bains-i ashibaji All Manipur Bar Association-i aitsüogo. Senior advocate Khaidem Mani-i Hombarnü ashiba agi, state bar association kübok okatsür shinga danga Bains-i Roger'er kibong tenüng nung okadak okatsütsü asoshi tongtepa mali.

**NCD aser...** (Tapak 1 nungi)

Senden nung, Diphu District Administration dang Nagaland kübok Rilan yimtsüng nungi sensotem apuba telatetba kecha melii chiochtsü atema takhangba agütsütsü aser aji mesüra, NCD aser UNTABA nati kechi junger ta bilemdir inyaksü, ta bangzünga renem.

Maneni, Dimapur district administration-i Diphu district administration den Rilan yimer pezü chiochtsü atema mapa inyaksü atema ayongzüksü lemtet, ta NCD & UNTABA-isa ashi.

**NGAKO CHINGMAK & IMDONGNOKDANG SEMCHIRTEM AKSÜ BENJONG AKA**



Chuchuyimlang yimtak Mejensanger Putu mapang, Chang kin Noksen yimtiba nungi Oboula Ngako Chingmak aser Ao kin Chuchuyimlang nungi Oboula Imdongnokdang, tenati tsürabur kishikina aksütep yimya tenzüker tanü tashi akangjungshitepa arur.

Tenati mapa tajung tentetsuba nung ajemdaker, taküma 25th May 2017 küm Chuchuyimlang yimtak, Yimlang Mepu Salang nung aksü benjong liasü. Iba aksü benjong senden nung, Noksen yimtiba nungi Oboula Ngako Chingmak semchirtem tebur nisung neter (70) shi arua aden. Yamaji Chuchuyimlang yimtiba nungia Oboula Imdongnokdang semchirtem tebur nisung jenti den, yimtsüng anaprongla nungi yimden yimsüsür, kidong balala nungi aser anükapangertem arua kanga longsoitepa among.

Iba tebou ana semchirtem akangjungshitep akaba ajanga, yimtsüng ana aser kin ana tali telongjemba nung apular küma semchirtemi alitsü akangshitep.

**Tebou ana semchirtem tenüng nung,  
Mr. T. Yanger Jamir. Dimapur.**

**OFFICE OF THE  
ALICHEN LONGKHUM STUDENTS' UNION  
ALICHEN: LONGKHUM (MOKOKCHUNG)  
FELICITATION**

The office of the ALSU, with immense Pride would like to extend our heartiest congratulation to the Students who brought laurels to the union.

1. Ms. I. Imlikala Imchen D/o Mr. Imnawapang with distinction marks in, ECO, HIS, Pol.Sc, EDU. HSSLC 2017.
2. Ms. Imtichela Longchar D/o Mr. T. Panger Longchar with distinction marks in Social Science, HSSLC 2017. And also to all the successful candidate in the recently declared HSLC & HSSLC 2017. Further the office wishes them success in their further Edeavour.

Sd/-  
Arikimong  
President

Sd/-  
Tsupongvokla  
General Secretary.

**OFFICE OF THE  
VILLAGE COUNCIL LONGSA**

**TEPELA ASER TENÜNGSANG LEMSATEPER**

Ao lima aser alima sünga lirepatsüka prokshia alir Ao Tzükong terok sanger senden lenitsü asoshi asür Imtimeren Ex. Minister Nagaland nangpong tanabuba Wb. Imliyanger Jamir Longsa, Ao Senden Tir shimtetba asoshi Longsa sensosanger ajak tenüng nung Village Council Salang ajanga asen Ao senden tenüng sanga tepela lemsateper.

Ajak Takoksang Tsüngremi Wb. Imliyanger Jamir nem anema aliba taküm den lenitsü shisa tajungtiba moajangma.

Sd/-  
Wb. I. Meren Pongen  
Chairman  
Village Council Longsa

Sd/-  
T. Akum  
Longsa  
Council Secretary.

**TEPELA LEMSATEPER**

Aso: 06-07-1981

Asü: 22/05/2017



Onoki teti meima aliba jabaso Asür **PUTIMEREN LONGKUMER** (Longsa), Mongsenbai Ward (Sewak Gate) shiranga alidang nungi tasüba anogo tashi medemsor shirnokisa pei senti rongsen, nübu, shisatsü aser sarasadem agi nungita yariogo, nenok ajak dang tebang agi meshitetba pelaba iba zulu ajanga lemsateper. Tsüngremi maneni na/ner kibong moajang ta ozü sarasadem.  
- Temeim Tsürabur, Adianu, Kinünger & Anükapang.

**MULUNGNEN O**



Asür Lima Imchen (Mangmetong)  
Asü: 23rd May 2017

Onoki meima aliba asür Lima Imchen, iba lima nungi pila orr onok mulung zürep aser amang agi subanger alidang temeimertem kwikati rongsen, nübu aser tamang sarasadem agi onok den yaritepogo, nenok ajak den asür kibongi kanga dang pelaba lemsateper. Onoki nenok kija shia dangi arua iba tepela melemsatepteter, saka tajung Tsüngremi nenok ajak talubosa moajang ta onoki sarasademtsür.  
- Temeim Kinüngtsü, Jala & Kinüngertem



May 30, 2017 nü Mokokchung Town Hall nung Human Trafficking indang Legal Awareness sentong nung NSCW Chairperson, Dr. Temsula Ao-i o jembiba noksa nung angur. Iba sentong ya Nagaland State Commission for Women (NSCW)-i National Commission for Women, New Delhi den yaritepa ayongzük

**V.J'S COACHING CENTRE**  
D.C. COURT ROAD, DUNCAN, DIMAPUR (ESTD. 2000)

**ADMISSION GOING ON**

⇒ Offer Extensive Coaching for the Repeaters of Class-X / XII-Arts / XII-Com / XII-Sci. for Improvement & Repeaters

⇒ Hostel attached for both Boys & Girls (Separately)

Contact : 03862-248394 / 248464 / 9436600530

## PM Narendra Modi-i Germany dang teyari meshi



**Berlin, May 30 (Agencies):** India Ato Kilonser, Narendra Modi tang Germany nung lir aser iba mapang nung tanga tongtibang onük aika jembiba den külemi Germany dang India nung football terenlok asoshi parnok dang yaritsü asüngdang.

2017 ya India nunger football asayaba tsütsü kanga tongtibang küm ka lir, kechiyong alima dang FIFA U-17 World Cup October nung ayonga amomba ajanga India sayutsü asoshi mezüngbuba maongka tulu anguba lir.

PM Modi aser German Chancellor, Angela Merkel-na külemi osangbenertem den

jembiba mapang pai ashiba agi, "Onok Germany den asaya balala, talisa football ajungketsü asoshi külemi inyakdar."

Germany puri Brazil nung FIFA World Cup 4ben buba akokba sülen parnok ya tang world champion lir. Germany nung football asayaba otsü ya kanga takar lir aser tang Europe nung temaba jenjang nung züngshiba club tem rongnung Germany nungi Bayern Munich aser Borussia Dortmund nunger parnok league nung asayadar.

Bayern Munich ya Germany nung club tem rongnung kanga dang takok nung aoba club ka lir aser taoba mapang nunga

parnoki India semdangogo. Parnoki taoba India captain, Baichung Bhutia tatembangbuba asaya nung All India Football den longjemer asayaa liasü. Iba asaya nung nüngtugu asayar Arjen Robben, Philip Lahm, Thomas Mueller aser Bastian Schweinsteiger nuger amala India team den asayaa liasü.

India football team FIFA world ranking nung 1996 küm sülen tang mezüngbuba top 100 jenjang tongtetogo.

Taoba India Ato Kilonser, Manmohan Singh-ia World Cup 5ben tashi koker aliba telok; Brazil dang kasa teyari meshia liasü.

## French Open nung Zverev aser Johanna Konta tsükogo

**Paris, May 30 (Agencies):** Spain nunger tennis asayar tejen, Fernando Verdasco-i World No. 10, Alexander Zverev Mongulbarnü Roland Garros nungi tsükdaktsüogo. Form nung alisang Germany nunger Zverev ya French Open mezüng round nung Verdasco-i 6-4, 3-6, 6-4, aser 6-2 agi tsükdangtsü.

Arishi küm 20 tain Zverev-i taküm Italian Open densema tournament asem tashi nung takok ngua lir, saka Verdasco-i asayaba ama pai masayateti pa iba tournament nungi tsükogo. Tetsür kasa tennis asaya nung British tsür rongnung No 1, Johanna Konta ya World No. 109, Hsieh Su-wei-i French Open mezüng round nungi tsükdaktsüogo.

Mezüng set nung Konta-i

mela-mela akok saka iba sülen Taiwan tsür Hsieh-i 1-6, 7-6 (7-2), 6-4 agi akok.

Arishi küm 26 tain, Konta-i Roland Garros nung asaya kata koka mali. La iba tournament mezüng round nung asemben tashi tamakok ajurur.

World No. 8, Konta-i Roland Garros atema qualifying match ponguben asayaba nung asemben dang koka lir.

"Ni maongka aika yanglutet amai bilemer, saka ni iba maongka junga mamshitet," ta Konta-i iba asaya temer osangbener den jembidang ashi.

Konta aser Hsieh-na ghonda 2 aser minute 15 asayaba sülen Taiwan tsürlai akok.

Roland Garros nungi Konta tsükba sülen British tsür kata iba tournament kija asaya nung mali.

## Invitational Tournament nung India Hockey team shilem agitsü



**Bengaluru, May 29 (Agencies):** Hockey World League Semi Final taruba ita masaya tsüngta June 1 nungi tenzüka Germany nung 'three-nation invitational tournament' ka nung shilem agitsü asoshi India team ogo.

Sports Authority of India campus Bengaluru nung hopta ana national camp ka nung shilem agiba sülen Manpreet Singh-i anir parnok 18 tanep Kempegowda International Airport nungi aposuogo.

Dusseldorf nung iba asayamong nung India nunger ya Germany aser Belgium na den asaya anana asayatsü.

"Hero Hockey World League Semi Final masaya tsüngda Germany aser Belgium nunger amala temaba jenjang nung aliba telok den asayaba ajanga onok nem teyari agütsütsü. Onoki parnok den kanga junga asayatetra iba ajanga onok aka asodaktsütsü aser ano aibelenba aser temelenshitsü lira item melenshitsü asoshi mapang tatsüka angutsü. Onoki onok asaya asadangtetsü aser London nung asayatsü asoshi tali tajungba renemshitettsü," ta Manpreet-i parnok maposu

tsüngda ashi.

Invitational tournament tembangli India team ya Hero Hockey World League Semi Final asayatsü asoshi London-i June 9 nü aotsü aser idakji Olympic Gold Medalists, Argentina aser Great Britain na den practice matcha asayatsü.

"Onoki practice match tem teti kanga temolung agüja asayar kechiyong iba asayatem nung junga asayatetba ajanga asayamong metenziük tsüngda renemshir atar. Aji dang masü penalty corner agitsü atema ground yimyya angateter atar," ta arishi küm 24 tain Manpreet-i ashi.

India nunger asayatem mezüngbuba asaya Scotland (June 15) den asayatsü aser iba sülen Canada (June 17), Pakistan (June 18) aser Netherlands (June 20) den pool stage nung asayatsü.

"Onoki team kata akoktsü asoshi tasak asütsü ta tuteta meshitettsü, kechiyong iba asayamong ya kanga dang tetushi aketba asayamong ka lir aser ajidang masü World Cup qualifier ta temolung nung yur team ajaki parnoki akokba tashi tajungtiba asayatsü," ta paisa maneni shisem.

## Roberto Carlos-i Australia nung Football coach atema yongyar



Roberto Carlos (File)

**Sydney, May 30 (Agencies):** Brazil nunger nüngtugu football asayar Roberto Carlos-i 'South Melbourne' club indang manager asütsü asoshi tejangraba lemsatepogo. Iba cluba ya domestic A-League nung shilem agitsü asoshi meranger.

Arishi küm 44 tain asayar shiba free kick metsüba nung

kanga nüngtugu lir, pa Hombarñü club ketdangsertem den Melbourne nung ajurutepogo.

"Nüburtem aser complex ngua ni kanga kongshiogo," ta taoba Real Madrid defender-i osangbenertem dang ashi. Pa taoba mapang nunga Turkey nung coach mapa inyaka liasü.

"Club atema tongtibangtibaji A-League nung adentsübaji lir aser asenok ajak senteber otsü aika yanglutettsü," ta paisa ashi.

Football Federation Australia-i A-League telok 12 kuma atsülangtsü asoshi sentong lir, saka iba sentongji 2018-19 season nungang mapa kuma inyaktetsü.

South Melbourne pur ya tang tekübokba league ka nung asayadar aser parnoki A-

League nung club tasen ana aniochtsü aliba nung parnok ka asütsü asoshi tejangraba lemsatepogo, ajisaka Sydney, Brisbane, Canberra, aser Tasmania nungi club temia iba league nung shilem agitsü asoshi parnok tejangraba lemsatepogo. Par teloki iba jenjang nung shilem agitettsü ta temolung lema bilemba olen ka South Melbourne bid mendenbuba, Bill Papastergiadis-i lemsatep.

"South pur-i onok club A-League-i aidang Roberto Carlos nem coach südaktsütsü asoshi jembitep tenzüko. Iba ya shishilembaba ka masü mesüra franchise ka masü iba ya shidakba club ka lir aser iba asoshi Roberto Carlos kanga tepet lir," ta paisa shisem.

## Arsene Wenger küm ana Arsenal manager inyaktsü

**May 30, 2017 (Agencies):** Arsene Wenger-i maneni Arsenal club nung küm ana manager inyaktsü molungogo aser iba ajanga pa iba club nung küm 21 inyaka aliba mapang atsülangshir.

Wenger aser iba club kibur, Stan Kroenke-na Hombarñü ajurutep aser Wenger tarutsü

anogo atema jembio.

Arsenal-i iba osang Bodhbarnü sangdongtsü sentong lir.

Gunners ya Premier League 2016-17 season jenjang ponguba nung tempang aser 1996 küm France nunger Wenger ya iba club nung arua dener temaba jenjang pezü

tsünglangi tang mezüng alur.

Par telok ya Premier League nung champion, Chelsea dang points 18 agi tajemba nung iba season tempang saka par teloki FA Cup final nung Chelsea madak 2-1 agi akok.

Arsenal nung Wenger manager inyaktsü indang contract ya tain season tempangtsü hasü.



London, May 30: The Oval, London nung ICC Champions Trophy metenziük tsüngta 'warmup match' Bangladesh den 2017, May 29 nung asayaba mapang India nunger Dinesh Karthik-i ball nung azükba noksa nung angur.

## BILEMDANGANG

"Taküm ya kanga tongmelang lir, saka asenok sasa tepenja kümdaktsür."